

Yesuac Mekperac Kperagi Yohanengo Ohoec

¹ Yoac yomoc Yesu Kristoac memekperagi. Yeac wanac ngicngacfora yeni wiac bic fingerudeac edzacyunubeso imoc Anutungo Yesu miec. Amma angeroya mong sueu yearusing yoara dekperagima wanacngiha ni Yohane, yoac imoc edenuc. ² Edenuu neng Anutuac yoac nga Yesu Kristoac dedekperagi amma wiac neannaoc hennegeng anai, imoc sasawa mekperagingemmeduae. ³ Naso wegenedeac mongngo profeteyoac yomoc osonegeng anude, ye kenehagoc. Nga ngicngac yeni yoac yomohai oho ohoya fede, imoc negemma hoanggegede, yeni ifingoc kenecnginagoc.

⁴ Ni Yohanengo Asia prowins manau kpebung 7 kecdae, ngeneac kibi yomoc ohoduae. Anutu kefec nga kecde amma kecma habesande. Ye nga asu 7 yeac ngictau tatacac hoangau kecdae, yenearunac ruae nga danggunuc imocngo ngenigoc febeso. ⁵ Nga Yesu Kristoarunac ifingoc. Yeng yoac modac modac seria amma ye siducedengic fora. Ye fingeacma homegec yeneac waracmedac amma bangecac ngictau yeneac kunengngina. Amma ye nenang songo negemma sawango kopocsicinaunac mesinunuec. ⁶ Mesinunuma eucerereng-gac habu menunuma yegoc arenunuu neni yeac Anutu nga Mamaac kurumenggac womong gareng amma kecnide, imocac ifi anec. Yearu

kibikperagi nga kuc imoc wisic wisickea kpac fekengkecheso, imoc fora.

⁷ Henggec, ye hoenggoc hau ngicngac sasawa yeneng kicnginango hendachesandae nga sebiau nenesari ammigec, yeni kicnginango ye ifingoc henggecde. Nga bangeha bangehaac areng sasawa yeni ye hemma fagung madzacgoc kiachesandae. O, imoc fora.

⁸ Kebu Anutu ye kefec nga kecdenoc amma kecma habesande, ye Kucseri minginango yofi dede, “Ni neannaoc A nga Y, hanac hanahea nga wisic wisickea.”*

⁹ Ni Yohanengo Anutuac yoacac nga Yesuac dedekperagiac amma Patmos nucfu kefai. Ngeneac dacngina, ngeni nga ni nenahafoc Yesugoc kpeketahema kpendzeng nga eucerereng mekecma modzotitia kpac seria kecdimbe.

¹⁰ Kebuac naso kereng monnu Asungo nearu ua meu ngadenau enacudumeng kunengtoa mong trampet udumeng isoc negembare yeng yofi deec,

¹¹ “Ge wiac hennecmoc, imoc kibiuhona. Ohoma kpebung 7 Efeso nga Simirna amma Peagamong nga Tiatira amma Sarde nga Firadefia amma Raodikea, ge kibi imoc yenearu faina kenu.”

¹² Ifi deu udumeng imoc hembadeac dzigeneai. Dzigenema hembra kifa nanangagoc 7 golngo memea nanggec yenenai. ¹³ Yenembare ye-

* **1:8:** Ye yofi deec, “Ni neannaoc Arafa nga Omega.” Arafa imoc grik yoac nonggeaac kibi hanac hanahea nga Omega imoc wisic wisickea. A imoc dedua yoac nonggeaac hanac hanahea nga Y imoc wisic wisickea.

neac botucfu mongngo Ngicac Medacac siric isoc nanec. *(Danie 7:13)*

Ye ngakpia herea hani susia kpesec kpeserea nga mokuhaul fadeng golngo dzege dzegea feec. ¹⁴ Ye orucsira nga orucdzoeya kongac kongac imoc ramadzoeya nga hoeng isoc[†] amma kiwa imoc gerec borang isoc. ¹⁵ Nga aieng saccac gerecfu ohogec wewengaima feande, ye hania imoc isoc anec. Nga enacadumenga, imoc doku homac yeneac udumeng isoc anec. ¹⁶ Ye marifoiiau asomeng 7 menanec nga enaraunac wasai beang mana ngadea enaragocngo ereec. Kicmesuya imoc wenaackiwa kuhagoc neraranggeande, ifi isoc anec.

¹⁷ Nga ye hemma haniau manuu homemea isoc febare yeng marifoiango witinau faima deec, “Ge mi kengecguu, ni hanac hanahea nga wisic wisickea amma kekecnagoc. ¹⁸ Henna, ni homeai nga monggoc gbori kecduae. Nga negenna, ni wisic wisickea kpac kecengkecma homec nga hofe yereac ki mekecduae.

¹⁹ Imocac ge wiac hendang imoc ohona. Ge wiac yaguc fede nga ngade fingerude, imoc momoc ohona. ²⁰ Asomeng 7 marifoinau menandua nga kifa nanangagoc 7 golngo memea hendang, imocac negen negeng sufufufuya yofi ande, asomeng 7 yeni kpebung 7, yeneac angero. Nga kifa nanangagoc 7 yeni kpebung 7 andae.”

2

¹ “Ge Efeso kpebung, yeneac angeroaru kibi

[†] **1:14:** Hania yoaclu hoenggac “Nomang kongac kongac kiac isoc maande.” ifi oho ohoya fede.

yomoc ohoma faina kenu.”*

“Ngic ye asomeng 7 marifoiau menande nga kifa nanangagoc 7 yeneac botucfu yeregede, yeng ngeneac yofi dede, ² ‘Ni geac angammemega nga ua esaga amma seserigoc kecanec, imoc negendacduae. Amma ge ngicngac mangana yeneac mi anggengande, imoc negenduae. Ngic goa yeni yenanggac aposoro dedae nga aposoro mi andae, ge tobangyununa yeni ikocngic, imoc bic fingectegerec. ³ Ge modzotitia kpac serima kecanec nga kpacnaac amma ebic homac tofohoma kucga mi maec.’ ”

⁴ “Nga hanahema heresongogoc hoangyunuma kecnec, faka imoc wanec, imoc ine negemba mi ngereede. ⁵ Ge warac kekecga dafiu wama maguec, imocac negen negeng ua mebesena. Amma ubaga meremma angammemega hanahema dafi angkecnec, imoc mebesena. Ifi mi amma ubaga mi merennade isoc ni gearu hama kifaga nanangagoc tatahaunac meickebade. ⁶ Geac gombangaga ine yofi ande, ge Nikora yeneac angammemengina ubango waannec, neng ifingoc imoc ubango wayai.”

⁷ “Kedzahagoc yeng Asungo kpebung yoc edeyunude, imoc negembeso. Nga firang anude, ye kekecac ic Anutuac eucererennu nande, imohacnac fora naric miba neude.”

⁸ “Ge Simirna kpebung yeneac angeroaru kibi yomoc ohoma faina kenu,”

* **2:1:** Grikyoacfusing angero titiha imoc siducedede. Siducedede yoc fede, imoc angero mong me ngic mong imoc mi dekperagide.

“Ngic homema gboriec kecde, ye hanac hanahea nga wisic wisickea, yeng ngenecac yofi dede, ⁹ Ge kpendzeng kpema kecnecc nga ge makpekpea, imoc negendacduae. Nga sifu finactoagagoc annec. Yudangic yeni yenanggac yudangic dema yudangic mi amma Satanggac kpekpeturang ama andae, yeni deendema anggengandae, ni imoc ifingoc negenduae. ¹⁰ Ge kpendzeng kpenadeac kengec mi ambesena. Mangana mingina yeng faitobannu faingunuudeac negemma ngenearunac goa witicamau faingunuu ngeni uameme 10gac manau ubahodunggoc kecgecde. Goa ngunuhomegecde isoc geng ine yoacdedena modacma seria kecmana kekecac ira gembade.”

¹¹ “Kedzahagoc yeng Asungo kpebung yoac edeyunude, imoc negembeso. Firang anude, ye homec kpetea yohockangngo naric mi memanganuude.”

¹² “Ge Pegamong kpebung yeneac angeroaru kibi yomoc ohoma faina kenu.”

“Ngic wasai beang mana ngadea enara santac metacde, yeng ngenecac yofi dede, ¹³ ‘Satanggac ngictau tataha tacde, ge bangec imohai kecnecc, imoc negenduae. Amma Satangngo kecde, imohai yeni dedekperagingic nga enactofoc tofohona seria Antipa, ye kpehomegec. Anu ngenecac botucfunac Antipa kpehomegec ge sifu negensinnuma kpacna seria mekecma kpacnaac basic mi kpenec.’”

¹⁴ “Faka goa gearu fede, imoc ine modzona tide. Ngicngac goa gegoc kecandae, yeneng Bireanggac

kpoukpou hoanggeandae. Yeng Israe nambaracfora mayunuudeac suba siriha dafi faiude, imoc Barake kpoumiec. Yeni nemuac seseyang nema sero ua megecdeac ifi anec.† ¹⁵ Anu goa yeni Nikoraac kpoukpou hoanggeandae, yeneng ifin-goc gegoc kecdae. ¹⁶ Imocac amma ubaga merembesena. Ifi mi annadeu ni gearu bic yombong hama enacnaac wasai beangno yunubade.”

¹⁷ “Kedzahagoc yeng Asungo kpebung yoac edeyunude, imoc negembeso. Ngic me ngac firang anude, ni ye mannayaka‡ sufu sufuya, imohacnac mima hoc mong kongac kongac nga kpac gboria mong ihai oho ohoya fede, imoc mibade. Kpac imoc mongngo mi negemmanu ngic hoc nearunac mede, yengsac negenude.”

¹⁸ “Ge Tiatira kpebung yeneac angeroaru kibi yomoc ohoma faina kenu.”

“Anutuac medac ye kiwa gerec borang isoc nga hania aieng sacsac gerec dzema wewengaima feande, kperagia ifia, yeng ngeneac yofi dede, ¹⁹ ‘Ni angammemega nga ngicngac songogoc hoangyunukecneac, imoc negenduae. Nga negen negensingga nga seserigoc kecma enactofoc tofoho angkecneac, imoc negendacduae. Amma angammemega wisic wisickeango hanac hanahea monggoc ferahade.’ ”

²⁰ “Anu ngac kpara Isebe, ye yengenaac profete deande. Ye kpoukpou ua ikocfu mekecma

† **2:14:** Bangec kisiu 25:1-3, 31:16 ‡ **2:17:** Yaka imoc yofi, Israe yeneng bangec kisiu yakaya kpac kecgec Anutungo asoac-soc yaka yemmeu bangecfu meficgegec, imoc kpara mannayaka degec. “Manna” imoc hebiraiyo yoac nga imocac titiha “Noc wiac?”

serofaka nga nemuac yang nene, imocac sinnu wanacngicfocna wangeocyunuande. Nga geng imoc mi kpetarimianecac modzona tide. § 21 Ye ubea merennudeac naso bic miba yeng ine ubea meremma kaiserofakaya waudeac mi ammdide.”

22 “Negenggec, ye hafei ammiu fefeu tarudeac faibade. Nga damoc yeneng yegoc kpeketahema serofaka angandae, yeni yeac angammemeaunac ubangina mi merenggecde isoc kpendzeng homac kpegecde.

23 Nga ni yeac nambaracfora kpebucyunuba kpebung sasawango yofi negentegecgecde, ni ubaherenginaac hengisingngic. Ni ngic tembus tembus angammemeaac sirihau turung kpoumibade. 24 Nga Tiatira kpebunnu ngicngac tosea kecdae, ngeni sifu yeac kpoukpou nga Satanggac negen negeng keme kemea dedaemoc, imoc mi megec. Nga ngeni yofi edengunuduae, ngeneac witiu ebic gboria monggoc mi faibade.

25 Amma wiac fengemmede, ngeni imoc seria mekecbisia nga ni kecma habade.”

26 “Ngic firang anude nga neac angammeme seria mekecmanu naso wisickeude, yeac yofi deduae. Ni Mannaarunac kuc meaiac bangeha bangeha yeneac kuneng kecduae. Nga ifi isocngoc ngic firang anudengo bangeha bangeha yeneac kuneng kefudeac uakibi nga kuc mibade.

27 ‘Nga yeng garengyunuma ngictauyasuya aiengngo memea mekecde, imoc mema ngicngo enang kpedzameandae, ifi isoc

§ 2:20: Ngac profeteyoac deec, yeac fakaya ngictau Ahaba enema Isebeac isoc anec.

yasuyango kpedzameyunuude.’ (*Mitiyegec* 2:9)

- 28 Amma ni asoacac asomeng ifingoc mibade.
 29 Kedzahagoc yeng Asungo kpebung yoac edeyunude, imoc negembeso.”

3

1 “Ge Sarde kpebung yeneac angeroaru kibi yomoc ohoma faina kenu.”

“Ngc Anutuac asu 7 nga asomeng 7 metacde, yeng ngeneac yofi dede, ‘Ni angammemega negendacduae. Ge naric kecnecc degengandae nga sifu homemea siric kecnecc. 2 Ge imocac amma gauunac yacma homeecac tosea homebeso amma fede, imoc mengerema meserina. Imoc yofiac, geac angammemega hengising amba Anutuac hehennu soha mi anec. 3 Yoac hanahema gearu hau menec nga kedzacgango negennec, imoc negensima hoanggema angammemega mengerebesena. Ge gbori gbori mi kecnadeu ni hamangecngic isoc gearu habade. Amma noc nasou habade, imoc naric mi negennadengoc.’ ”

4 “Anu geac arenunac ngicngac efeanecngo ine wambangina wonong mi megec. Ni haniangina ifia henaiac ngeni wamba kongac kongac heima nigoc nenahafoc kengha naric annide. 5 Ifi anu mong ye firang ande, ye wamba kongac kongac heimigecde. Nga ni yeac kpac kekecac kibiunac naric mi meickebade. Amma yeac kpara Manna nga angerofora yeneac kicfu dekperagibade. 6 Kedzahagoc yeng Asungo kpebung yoac edeyunude, imoc negembeso.”

⁷ “Ge Firadefia kpebung yeneac angeroaru kibi yomoc ohoma faina kenu.”

“Kpetiac kekec nga faka foraac mingina, yeng Dawidiac ki metacde. Ye nagu witiu ngic mongngo naric mi heiude nga nagu heiu mongngo naric mi witiude. Nga yeng ngeneac yofi dede,⁸ ‘Ni angam-memega negendacduae. Imoc yofiac, ge kuc-mama kecnec amma sifu neac yoacna hoanggema kpacna mi ngadehenec. Imocac nagu mong wit-igemba ngic mongngo imoc naric mi heiude.’

⁹ ‘Anu ngic goango Satanggac kpekpeturang amaunac, yeni yenangac ikoc amma yudangic dema yeni yudangic mi andae, kpac. Nga ni geac songo negenduae, imoc yeneng negen-tegecgecdeac ayemmeba yeni gearu hama hanigau fafoc heima ewehei anggenggecde. ¹⁰ Ge modzotitia kpac serima kecnadeac edeguai, imoc seriangoc mekecnecac amma ni faitobannunac meicgubade. Faitobang imoc bangectoa bangecac ngicngac yenearu fingerudeac dedea fede. Nga imoc fingeru neng ifingoc hoangguma imohacnac meicgubade.’

¹¹ ‘Ni bic habade, imocac geng ira mekecnec, imoc ngic mongngo mi meudeac angammemega garenggema seria mekecbesena. ¹² Firang anude, neng ye gununggeba Anutunaac womong manaac wotung seria anude. Nga ye womong imoc monggoc mi waude. Nga ni yea witiau Anutunaac kpac amma Anutunaac taongtoaac kpara nga neanna kpacna gboria ifingoc ohobade. Taongtoa imoc Anutunaac taong nga imoc Yerusareng gboria amma kurumennunac neac Anutuarunac maude.’

¹³ Kedzahagoc yeng Asungo kpebung yoac edeyunude, imoc negembeso.”

¹⁴ “Ge Raodikea kpebung yeneac angeroaru kibi yomoc ohoma faina kenu.”

“Ngic kpara Fora, ye dedekperagingic amma yoara modackecde nga yoac fora dekecde. Ye Anutungo wiac sasawa deu fingerec, imocac hania kecde, yennoc yoac yomoc dede, ¹⁵ ‘Ni angam-memega negendacduae. Ge gerea me nomana mi kecne. Gerea me nomana kecbannu songo negembai. ¹⁶ Nga geng ine gerea me nomana mi kecma botuhau aka saraka annecac enacnaunac urunggubeso anduae. ¹⁷ Ni finactoanagoc nga wiac monggac mi obohoduae, ge geanggaac ifi dema sifu mangana yombong kecne nga ngic yeneng geac ubahodung negenggecdeac siriha, imoc mi negenne. Ge makpekpea nga kicpisc amma senggang kecne, imocac yofi edeguduae, ¹⁸ finactoagagoc annadeac nearunac gol gerecngo dzedzea mebesena. Amma senggang gameagoc mi nannadeac wamba kongac kongac mema wambagagoc ambesena. Nga kicfifi annadeac kicac kereha kicga imocngo dzuacnadeac bum-mebesena.’

¹⁹ ‘Neng ngicngac damoc ngeneac songo negengngemmeanduae, ngeni demeting nga ngunumengere angemmeanduae. Imocac serima ubaga merembesena. ²⁰ Henna, ni naguu namma kpong kpong heikecduae. Heikecba mongngo neac kedzac faima ubadzidzina negemma nagu mesideu neng yearu emba neri nerahafoc tacma yaka nedede.’

²¹ ‘Ngiç firang ande, ni emba Mannagoc yeac tatacfu tacandipe, ifi isoc firang andemoc neng ngictau tatacfu tatacna miba nerahafoc tacde. ²² Kedzahagoc yeng Asungo kpebung yoac edeyunude, imoc negembeso.’ ”

4

¹ Anu ni nagu mong witi witia kurumennu henai. Amma ubaudumeng warac trampet isoc yoac edenuu negennai, yeng yofi deec, “Ge yei erena. Yomocac ngadeau noc faka fingeche-sande, imoc edzacgubade.” ² Ifi deu imohaingoc Asungo kicna merēcgeu ni kurumennu ngictau tatak faifaia hembra ngic mongngo imocac witiau tarec, ³ yeac siriha hoc seria nga gombunga kpac-ngira yaspa nga kaneriang, yeri isoc. Nga asom-madoc mong emerare hoc isoc, imoc ngictau tatak yeregema feec.

⁴ Ni ngictau tatak goa, kpetengina 24, yenenai, imoc yeneng ngictau tatak yeregema nanggec. Tatak imocac witiau ngic enara 24 tacgec. Ngiç enara yeni ngakpingina kongac kongac heima orucngina witiau ira golngo memea heigec. ⁵ Ifi yenembare piratac nga udumengtoa amma gbumparandang ngictau tatacfunac fingerec. Ngictau tatakac kiwau kifa 7 dzetacgec, imoc Anutuac Asu 7. ⁶ Nga ngictau tatak kiwau wiac mong kondungtoa isoc garasngo memea, garas imoc gontaninga henai.

Anu ngictau tatakac noboc noboc 4, imohai wiac kekecnginagoc 4 oronggema nanggec, ifi yenenai. Yeni hoangnginau nga ngadenginau imoc sasawa kicngo wake wakea. ⁷ Wiac kekehagoc warac

warac, yeac siriha raiong isoc. Nga wiac kekehagoc mong yeac ngadeau, ye burumaka ngiwa kuhagoc isoc. Nga wiac kekehagoc mong yeac ngadeau ye kicmesuya siriha ngic isoc nga wiac kekehagoc wisic wisickea, ye huntoctoa kpututuckeande, ifi isoc anec. ⁸ Wiac kekecnginagoc 4 yeni tembut tembut kpegangngina 6. Nga sebingina imoc kicngo sasawa soko sokoya amma kpegangngina bageau, imoc ifingoc kiwagoc anec. Amma yeni wenac nga tofocnasoc kecnegenga kpac yofi dema kecgec,

“Kebu Anutu Kuctoa mingina ye kpetiac, kpetiac nga kpetiac. Ye kefec nga kecede amma kecma habesande.”

⁹ Anu wiac kekecnginagoc yeni ngictauac tatahau takecede nga wisic wisickea kpac kecbesande, dengerema eweheimima dangge dekecgec, naso imohai ¹⁰ ngic enara 24 yeni Kebu ngictau tatacfu takecede nga wisic wisickea kpac kecbesande, yeac haniu makpegec. Makpema ye afehema irangina mesima ngictau tatacac haniau ukuma yofi dekecgec,

¹¹ “Ge Kebu nga Anutunina. Geng wiac sasawa dena fingececarec. Ifi negemma meficgedacnecac geng kibikperagi nga eweheihei amma kuc sasawa medacna ngereeyombonggede.”

5

¹ Kebu ngictau tatacfu tarec, ye kibi kpou kpouya mong marifoiau mekefec. Nga imoc kibi manaac ngadeau kibi oho ohoya feec. Anu imohai kendokereha 7 onganginagoc, imocngo

mendac mendanggea henai. ² Ni angero mong kuhagoc hembra yeng uba kunengngo yofi arohoec, “Merac eweheiheiagocngo kibi mendac mendanggea mekpacgema kpou kpouya imoc witiudeac siriha ande?” ³ Arouhou kurumennu me bangecfu me bangec bageau ine ngic mong kibi kpou kpouya imoc witiude me oho ohoya, imoc hehenggacsoc mi kefec. ⁴ Nga ngic mongngo kibi imoc mekpacgeudeac me hengenggac siriha hofocgecac kiachodung hodung kiarai. ⁵ Kiacba ngic enarafocngina yenearunac mongngo yofi edenuec, “Negenna, ge kiac wana! Yuda kisicfunac raiong nga Dawidiac godeaunac sera, yeng firang anec. Imocac amma ye kibi kpou kpouya mendac mendanggea 7 mekpacgema kibi imoc naric witiude.”

⁶ Ifi deu yofi henai. Ngictau tatak nga wiac kekecnginagoc 4 amma ngic enara 24 yeneac botucfu ramamedaha mong nanec nga ye kpehomemea isoc anec. Ramamedaha imoc ye baiha 7 nga kiwa 7. Kiwa imoc Anutuac Asu 7 nga imoc yeni bangectoa bangecfu sueyunuyunuya. ⁷ Yennoc kemma ngictau tatacfu tarec, yeac marifoiaunac kibi kpou kpouya meec. ⁸ Kibi imoc me manu kekecnginagoc 4 nga ngic enara 24 yeneng yeac kicfu makpegec. Yeni sasawa tembut tembut gita kurerenganoc* nga sokoc golngo memea metagec. Sokoc imohacnac hosuc homuna gombunga ereec. Wiac hosuhagoc sokocfu feec, imoc ngicngac kpetiac yeneac nunumungina, imocngo sokocnginau wake wakea feec.

* **5:8:** Musiac onga goa hafac (244) imohai fede.

⁹ Anu yeni yegec mong gboria yofi heigec,
 “Geng kibi kpou kpouya mema kendokereha
 naric mekpacgenade. Imoc yofiac,
 ngic yeneng kpebucgugec geac sacngo
 ngicngacfocga bummeyununec. Ge
 ngicngac fakaga fakangina nga yoacga
 yoacna amma sebi siric hania hania nga
 bangeha bangeha sasawa yeneacunac
 bummeyununec Anutuac areng amma
 kecdae. ¹⁰ Bummeyunuma Anutuac
 eucererennu arengyununa yeni womong
 imocac gareng anggecdeac areng, imoc
 menec. Mena yeni bangeha bangeha
 yeneac gareng anggecde.”

¹¹ Ni kicna merec merecgeangoc kecbare
 angero homac yeni ngictau tatac nga
 wiac kekecnginagoc amma ngic enara 24
 orongyunugec ubaudumengngina negennai.
 Amma yeneac kpetengina imoc 10 tauseng naso
 10 tauseng nga tauseng naso tauseng. ¹² Yeni
 ubaudumengtoanginagoc yofi degec,

“Ramamedaha kpebuc kpebucgea, ye kpac
 kuneng nga finactoa amma negen
 negentegec nga kuc nga eweheihei nga
 kibikperagi amma kenec mibesonga
 ngereede.”

¹³ Nga wiac sasawa Anutungo deu finge.cdarec ku-
 rumennu nga bangecfu amma bangec bageau nga
 kondunnu, yeneac manau wiac sasawa kecdae,
 yeneng yoac yofi degec negennai,

“Ngictau tatacfu tacde nga ramamedaha,
 yerearu kenec nga eweheihei amma

kibikperagi nga kuc wisic wisickea kpac fekengkecbeso.”

¹⁴ Ifi degec wiac kekecnginagoc 4 yeni “Imoc fora.” degec nga ngic enara 24 yeni makpema ye afehegec.

6

¹ Ni imoc hembare ramamedahango kendokereha 7 ongayagoc warac warac kibi mendac mendanggeau tarec, imoc mekpacgeec. Nga wiac kekecnginagoc 4 yenearunac mongngo ubaudumenga parandangac udumeng isocngo kpacma yofi deu negennai, “Ge hana!” ² Ifi deu ni fima becosic kongac kongac mong henai nga imocac witiau ngic mongngo tebeagoc tarec. Taru ira mong migec ye imoc heima firang anganggac arennu firang anudeac becosicfu kenec.

³ Nga ramamedahango kendokereha mong mekpacgeec, imohai negemba wiac kekehagoc mongngo “Ge hana!” deec. ⁴ Ifi deu becosic mong sacsacngo haec. Yeac witiu ngic tarec, ye wiac goa migec. Ye ngicngac yeni kpebucemegecdeac bangeha bangeha, imohacnac ruae meic meickeac kuc migec nga wasai beangtoa mong migec.

⁵ Nga Ramamedaha kendokereha monggoc mekpacgeu wiac kekehagoc mongngo monggoc yofi deec negenai, “Ge hana.” ifi deu becosic dzadzu mong henai. Nga ngic yeac witiu tarec, ye sigeri mong mariau metarec. ⁶ Nga wiac kekecnginagoc 4, yeneac botucfunac ubaudumeng isoc mongngo yofi deu negennai, “Wit lita mocguac buma, imoc uameme mocguac

uabung ande nga bari lita harebec, imoc uameme mocguac uabung ande. Anu ge kerecdoku nga waing mi memanganebesena.”*

⁷ Ramamedahango kendokereha monggoc mong mekpacgeu negemba wiac kekehagoc mongngo monggoc “Ge hana!” deec. ⁸ Ifi deu hembra becosic meac meac mong amma ngic yeac witiu tarec, kpara homec, yeng hofe hesickeu haoc. Haec yereng bangectoa bangec tegia 4, imohacnac noboha mocgu ($\frac{1}{4}$) imoc yereng wasai beang nga bodi amma homectoa nga kateyang mehaoc. Mehaec imocngo ngicngac yunuhomegecde, imocac uakibi nga kuc yemecyemera.

⁹ Nga ramamedahango kendokereha mong monggoc mekpacgeec, imohai yofi henai. Ngicngac Anutuac yoac mekecma dekperagigecac yunuhomegec, yeneac ubaongangina arataac bageau fegec. ¹⁰ Yeni ihai fema kucgoc arohoma yofi kpacgec, “O Kunennina, ge kpetiackekec nga yoac foraac mingina, ge nocac turung kpoukpou naso mehereema sacninaac kopocsic negemma ngic bangecfu kecdae, yeni kopocsicnginaaac turunga mi yemmenec.” ¹¹ Ifi degec ngakpi herea kongac kongac tembus tembus yemmema edeyunugec, “Wanacogofocngina nga tosofocngina yeni ifingoc yunukpebus ayemmegec kpeteu heiudeac ngeni kapianec monggoc tacnegembisia.”

* **6:6:** Siriwa dzo me denari mocgu nande. Yohaneac nasou siriwa dzo mocgungo uameme mocguac bung anec.

¹² Anu ye kendokereha wisic wisickeaac bageau mekpacgeu henai. Hembra usoctoa meu wenaackiwa dzadzu kpeec. Imoc ubahodunggac ngakpi isoc, ifia nga afo hafoangoc sac isoc anec. ¹³ Nga firangtoa kpema ic kpemindaheu ic gbomea mangganga icfunac kpemorongyunuu maanda, asomeng yeni ifi isoc† bangecfu foctockema magec. ¹⁴ Magec ngicngo kibi kpouanda, kurumengngo ifi isoc kpouma kpac anec. Kpac anu tiki nga nuc sasawa tatacnginaunac meickedacgec.

¹⁵ Ifi anu bangecac ngictau nga ngickuneng amma dzikacac ngickuneng nga ngic finactoanginagoc amma ngic seria amma wanac areng mingingngina bageau kecgac nga ngicngac witicngina kpac kecgac, yeni sasawango kemma kedzebe manau nga hoctoatoa bagenginau sufudacgec. ¹⁶ Sufuma tiki nga hoc yeni yofi edeyunugec, “Ngeni witininau mama ngictau tatacfu tacde, yeac kicfunac nga ramamedahaac ngabaunac semenunubisia. ¹⁷ Yereac ngabaac nasotoa bic hadacac neni naric mi serima nannide.”

7

¹ Imocac ngadeau angero 4 yenenai. Yeni bangectoa bangec, imocac tuturung 4, imohai nanggec. Nga yenemba yeni bangecac firang 4 medzickema nanggec firang imoc yeni bangecfu me kondunnu me icfu kpegecdeacsoc mi anggec.

² Anu ni angero mong henai. Ye Anutu kekehagoc yeac onga mekecma wenac ere ereaunac haec. Nga angero 4 yeni bangec nga kondung

† 6:13: Ic kpara fig dede.

memanganegedecac ua yemmeyemmea, yeng yeneac kpacma yofi deec, ³ “Ngeni bangec me kondung me ic bic mi memanganebisia. Neneng Anutuninaac wanacarengfora mesunginau kibi faiminaguc ngeni ine wiac sasawa memanganebisia.”

⁴ Anu ngicngac mesunginau kibigoc, yeneac kpetengina 144 tauseng degec negenai. Kibinginagoc imoc yeni Israe medacforaac habuareng 12, yeneacrunac sasawa. ⁵ Mesunginau kibigoc yeneac kpetengina yofi,

Yuda kisicfunac 12 tauseng

Rubeng kisicfunac 12 tauseng

Gade kisicfunac 12 tauseng

⁶ Ase kisicfunac 12 tauseng

Naftari kisicfunac 12 tauseng

Manase kisicfunac 12 tauseng

⁷ Simong kisicfunac 12 tauseng

Rewi kisicfunac 12 tauseng

Isasa kisicfunac 12 tauseng

⁸ Seburong kisicfunac 12 tauseng

Yosefe kisicfunac 12 tauseng nga

Benyaminggac kisicfunac 12 tauseng.

⁹ Imocac witiau habutoa yombong yenenai nga kpetengina imoc ngic mongngo naric mi osoude. Ngicngac yenenai, yeni bangeha bangeha nga fakaga fakangina amma yoacna yoacga nga sebi siric hania hania, yeneacrunac. Amma yeni ngakpingina herea kongac kongac heima maringinau pam icac maria mema ngictau tatacfu nga ramamedahaac kicfu nanggec. ¹⁰ Namma yofi dema kunengngoc arohogec,

“Anutunina ngictau tatacfu tacde nga ramamedaha yeri memengerec mingina.”

¹¹ Ifi degec angero sasawango hama ngictau tatac nga ngic enara 24 amma wiac kekecnginagoc 4 orongyunuma nanggec, yeni ngictau tatacac kiwau makpema kicngina hetutuckema Anutu afehegec. ¹² Afehema yofi degec,

“Fora, kenec nga kibikperagi, negen negentegec nga ubangerec, eweheihei nga kpac kuneng nga kuc imoc Anutunina ammini nasoya nasoya feengkecheso, imoc foranoc.”

¹³ Ifi degec, ngic enara yenearunac mongngo yofi kpesinenec, “Ngicngac ngakpingina herea kongac kongac yomoc, yeni merac merac nga yeni dahacnac hagec?”

¹⁴ Kpesinenu merenai, “Kunenna, ge geanggaoc negennec.” ifi deba yeng yofi edenuec, “Ngic yomoc yeni kpendzengtoanac hama ngakpingina ramamedahaac sawango dzuacgec kongac kongac ande. ¹⁵ Imocac amma yeni hadzing tofocnac Anutuac womong manau ngictau tatacac kiwau namma yea kingang kpema ua mekecdae. Megec Kebu ngictau tatacfu tacde, yeng yenigoc kecma kporuchedzoya yeneac witiu faiu tarude.

¹⁶ Nga yeni herenginaac monggoc mi homegecde nga dokuac mi ayemmeude. Wenacngo monggoc mi yonohoude nga wiac goaac gereango naric mi yonohoude. ¹⁷ Imoc yofiac, ramamedaha ngictau tatacac dzongiau nande, yeng ramagarengngina amma kekecac dokukiwau hesicyunuude. Nga Anutungo kickumangina sasawa kicnginaunac mekerenggeude.”

8

¹ Ramamedahango kendokereha wisic wisickea mekpacgeec, imohai kurumennu aua nobohaacsoc ning yombong kpeec.

² Ning kpeu angero 7 Anutuac kicfu nandae, yeni trampet 7 yemmeyemnea yenenai.

³ Anu angero mongngo sokoc golngo memea meemma arata kiwau nanec. Nanu sopo homuna gombunga imoc homac migec. Migec imoc ngicngac kpetiac yeneac nunumugoc kpeturanggema arata golngo memea, imohai gerecfu faiec. ⁴ Ye ifi ammanu yeac mariaunac hosuc homuna gombungango ngicngac kpetiac yeneac nunumugoc kpeturanggeu Anutuaru enec. ⁵ Enu angero ye sokohango arataunac gerec fiu wakeu bangecfu ukuec. Ukuu gbumparandang nga udumengtoa amma piratac homac fingeru usoc meec.

⁶ Meu angero 7 trampetnginagoc yeneng ffigecdeac efaigec. ⁷ Efaigec angero warac warac yeng trampeha fifiu nomang gbomea* nga gerec, imoc sacgoc kpeturanggema imocngo ffigecma bangecfu maec. Mau bangectoa bangec, imocac tegia harebec imohacnac noboha mocgu ($\frac{1}{3}$) dzeec nga ic sasawa bangectoa imocac manau nanggec, yeneacunac harebecac noboha mocgu ($\frac{1}{3}$) dzeec amma kpingding tengging tengging sasawa gerecngodzedarec.

⁸ Nga yeac ngadeau angero mongngo trampeha fifiu tiki kuneng gerehagocngo kondunnu mau kondungtoa tegia harebec imohacnac noboha

* **8:7:** Bangec nomanau kia gbomeango sawau nomanema seria anude.

mocgu ($\frac{1}{3}$) sac anec. ⁹ Anu kondunnu wiac kekec-
nginagoc kecdae, yenearunac harebecac noboha
mocgu ($\frac{1}{3}$) homedacgec amma wage yenearunac
harebecac noboha mocgu ($\frac{1}{3}$) kpac anggec.

¹⁰ Amma yeac ngadeau angerongo monggoc
trampeha fifiu kurumennunac asomengtoa mong
ahakifa isoc dzema fotockema maec. Mama doku-
toa nga dokukiwa yenearunac harebecac noboha
mocgu ($\frac{1}{3}$) witinginau heiec. ¹¹ Asomeng imoc
kpara Hodunga. Anu doku yenearunac harebe-
cac noboha mocgu ($\frac{1}{3}$) imoc hodunga anec. Nga
doku hodunga anecac amma ngicngac homacngo
homegec.

¹² Nga angero mongngo trampeha fifiec. Fifiu
wenac nga afo amma asomeng yeneac kperagiaac
kuc imohacnac harebecac noboha mocgu ($\frac{1}{3}$) kun-
dung kpeudeac meickeec. Meickeu hadzing tofoc-
nac yereac kperagiaac kuc imohacnac harebecac
noboha mocgu ($\frac{1}{3}$) mi fingerec.

¹³ Anu hembra huntoc mong wi kurumeng
botuhau kpututuckeu ubaudumenga negembare
kunengngoc yofi arohoec, “Angero harebec
yeneng trampetngina fifigec arohou ngicngac
bangecfu kecdae, ngenearu ubahodung,
ubahodung, ubahodung fingerude.”

9

¹ Angero 5ngo trampeha fifiu ni asomeng mong
kurumennunac mamaya henai. Hembra ye teng
buya kpac, imocac ki migec. ² Migec yeng ki imoc
mema teng buya kpac mesiec. Mesiu gerecngo
ua dzeu hosuc kuneng ereande, hosuc siriha ifia
isocngo tennunac ereec. Teng imohacnac hosuc

ereu wenac nga sawaac kperagi kucngira maec.
³ Anu hosucfunac ipua erema bangecfu magec.
 Magec bangecac weme weme yeneac kuc isoc
 yemmema ⁴ yofi edeyunugec, “Ngeni kpindzing
 nga wiac sasawa maria tengging tengging fede
 amma ic, imoc mi memanganebisia. Ngeni ng-
 icngac Anutuac kibi mesunginau mi mekecdae,
 yenisac memanganeyunubisia.”

⁵ Nga yeni dederecge yofi ayemmegec, “Ngeni
 afo 5 kpendzeng yemmebisia nga ngeni mi yini-
 homebisia.” Nga kpendzenga imoc weme we-
 mengo yiniu angande, ifi isoc anec. ⁶ Naso imohai
 ngicngac yeni homec hofocma naric mi home-
 gecde. Nga homegecdeac negenggec homecngo
 yeneacunac woraude.

⁷ Anu ipua siricngina imoc dzikacac becosic
 mengereandae isoc. Orucnginau ira golngo
 memea isoc tarec nga kic samacngina imoc ng-
 icngac yeneac isoc. ⁸ Nga orucdzongina imoc
 ngac yeneac isoc amma enacsicngina imoc raiong
 yeneac enacsic isoc. ⁹ Nga mariku heigec, imoc
 aiengngakpi isoc amma kpegangnginaac udu-
 meng imoc becosic homacngo dzikacfu nedzima
 keretac kpedzima udumenggoc kengandae isoc.
¹⁰ Amma dzingina enaragoc imoc weme weme
 enacngina isoc anec. Nga yeni ngicngac meman-
 ganeyunugecdeac kucngina afo 5 imocacsoc fec.
 Nga kucngina imoc dzinginau tarec. ¹¹ Hofe buya
 kpac, imocac angerongo* yeneac ngictaungina ke-
 fec. Yeac kpara imoc hebiraio yoacfu Abadong

* **9:11:** Hania yoacfu angero imocac titiha siducedede me suesuea.

nga grik yoacfu Aporiong.†

¹² Yei ubahodung warac warac wisickedede. Negenggec, imocac ngadeau ubahodung yohockangngoc haecde.

¹³ Nga angero wisic wisickeaac bageau, yeng trampeha fifu Anutuac hoannu arata golngo memea, imocac tuturungasoc baiha 4, yenearunac enacudumeng mong negennai.

¹⁴ Negemba yeng angero wisic wisickeaac bageau trampehagoc yofi edeec, “Angero 4 Eufrata dokutoa tegiau witicyunugec nandae, yeni yungecyununa.”

¹⁵ Angero 4 yeni ngicngac yenearunac harebecac noboha mocgu ($\frac{1}{3}$) kpebucyunugecdeac aua nga uameme amma afo nga kifanaso yomocac amma efac efaia kecgec yeng yungecyunuec. ¹⁶ Anu wasaingic becosic witiau tacgec, yeneac kpetengina 200 mirieng (200,000,000) degec negenai.

¹⁷ Nga kicna tegecmangoc taru wasaingic becosicnginagoc yeneac siricngina yofi henai, yeni aiengngakpingina kpaua nga dzadzu amma asong botuc nga dzagec dzagec, imoc hoc kpara sarafa‡ isoc. Nga becosiac oruc imoc raiong isoc nga enacnginaunac gerec nga hosuc amma asenga mangac manganea erema kenec.

¹⁸ Kpendzeng harebec, gerec nga hosuc amma asenga mangac manganea, yeneng becosic enacnginaunac erema ngicngac yenearunac harebecac noboha mocgu ($\frac{1}{3}$) kpebucyunugec.

¹⁹ Kuc imoc becosic enacnginau nga dzinginau

† 9:11: Kpara imocac titiha memangac mangane ngic. ‡ 9:17: Hoc imoc gerectikiunac maande nga imoc dzagec dzagec amma homuna mangana.

tarec. Nga dzingina imoc yeni boudzoc isoc orucnginagoc nga yeni imocngo wiac hania hania memanganekegec.

²⁰ Anu ngicngac tosea kpendzeng 6 yomocngo mi yunuhomeec, yeneng ine ubangina mi dzigenegec. Amma yeni asu mangana nga nemuonga gol siriwa kopa nga hoc amma icngo memea numuyemmegecdeac faka mi wagec nga nemuonga maringinango memea, imoc mi ngadehegec. Nemuonga ifia yeneng wiac mong mi henggecde nga kedzacnginango mong mi negenggecde amma haningnginango naric mi tikenggecde. ²¹ Nga ngicngac yeni ubangina mi dzigeneu yunukpebuc, dzinac nga mosoc faka amma kaisero faka nga hamangecmeme, faka imoc sasawa mekecma mong mi wagec.

10

¹ Anu ni angero kuhagoc mong hembra kurumennunac maec. Ye hoengngo temboc tembonggea oruhau asommadoc heiec nga kicmesuya imoc wenackiwa isoc amma hanihora imoc wotung isoc gerehagoc. ² Amma ye kibibisic kpou kpouya mong mariaui yungec yungera metarec. Metacma hanifoia imoc kondunnu nga kanaya imoc bangecfu faiec. ³ Faima raionngo arohoande, ifi isoc kucgoc arohoec.

Arohomanu gbururung 7 yeneac enacudumengnginango yoac degec. ⁴ Ifi degec ohobeso ambare kurumennunac enacudumeng mongngo yofi edenuu negennai, “Gbururung 7 yoac degec ge imoc mi ohona. Imoc mesufuna febeso.”

⁵ Ifi deu angero bic henaimoc, yeng kondunnu nga bangecfu namma marifoia kurumennugeng miacma ⁶ yoac deserima yofi deec, “Kebu kecede nga kecengkefude nga kurumenga kurumenga nga kondung amma yeneac manau wiac sa-sawa fede, imoc yeng deu fingececarec, ni yeac kpac kpacma yoara meserima yofi deduae, ‘Naso wisickede.’ ⁷ Angero wisic wisickeango trampeha fifibeso ammanu udumeng negenggecede, imohai yofi negembisia. Anutungo wanacngicfora profete yoac bic edeyunuec nga Anutuac negen negeng sufu sufuya feec, imocngo naso imohai fingecegerude.”

⁸ Anu enacudumeng warac kurumennunac negenaimoc, yeng yofi edenuc, “Ge kemma angero kondunnu nga bangecfu nande, yeac mariunac kibi kpou kpouya yungec yungera, imoc mebesena.” ⁹ Ifi deu angeroaru kemma kibibisic kpou kpouya imoc nenudeac edeai. Edeba yeng deec, “Ge mema nena imoc heregau kemema herega dzeude nga enacgau ine kukundzau isoc songea anude.” ¹⁰ Ifi deu ni angeroac mariunac kibibisic kpou kpouya mema neba imoc enacnau kukundzau isoc songea anec. Nga herenau kemema aengagoc anu ¹¹ yofi edenuc, “Ge ngicngac sebi siriha hania hania nga bangeha bangeha amma yoacna yoacga nga ngictau homac yeneac profeteyoac monggoc debesena.”

11

¹ Anu yeni kpetememe mong yasu isoc nemma yofi edenugec, “Ge yacma Anutuac womong nga arataac kpetengira mema ngicngac

ihai Anutu dengeredae, yeneac kpetengina momoc mebesena. ² Nga sobeng odayagoc amakiwau fede, imoc bangec monnunac ngicngac yemmeyemnea. Imocac amma ge imocac kpete mi mebesena. Yeni afo 42ac manau taong kpetiac* tidzamema memanganegecde. ³ Anu ni enacdedehocna kuc yemecba yeri toruwamba heima uameme 1 tauseng 2 handret 60ac (1260) manau profeteyoac deecde.” ⁴ Yeri oriwa ic yohockang nga bangecac Kebuac kicfu kifa nanangagoc yohockang nangkecdape. ⁵ Ngic mongngo yeri memanganeyurubeso negendeu gerecngo enacngiraunac erema ngabafocngira yonohou homegecde. Monggoc deba, mongngo yeri memanganeyurubeso negendeu ye homecac areng amma ifi homeude. ⁶ Enacdedehocna yeri profeteyoac dekecma kurumeng heiec kia mong mi kpeude, yeri uayoac nga kuc ifia mekecdape. Amma yeri yeraoc naso dema doku heimerenec sac anudeac uayoac nga kuc mekecdape. Amma yeri kpendzeng hania hania bangecfu faiecdac uayoac nga kuc ifingoc mekecdape.

⁷ Anu yeri dedekperagingira edeyunudarec wisickeu wasaiyangtoango teng buya kpac, imohacnac erema yerigoc ewema firang amma kpebucyuruude. ⁸ Kpebucyuruu farengngira taonggac sinnu feece. Taongtoa imocac kpara kpefing yoacfu Sodong nga Aigita nga bangec imohaingoc Kebunina mariponnu kpegec homeec. ⁹ Nga uameme harebec nga nobohaac manau ngicngac sebi siriha hania hania nga

* **11:2:** Taong kpetiac, imoc Yerusarenggac kpara mong.

fakaga fakangina amma yoacga yoacna nga bangeha bangeha ngicngac yeneng farengngira hemma tonggogecdeac kpetariyemmegecde.

¹⁰ Kpetariyemmegec ngicngac bangeha bangeha kecdae, yeni sasawango songo nga ubangerec negemma ubangerecac iwai goa emegecde. Profete yohockang yereng bangeha bangeha ngicngac kpendzenu faiyunuocac ifi ayecmegecde.

¹¹ Anu uameme harebec nga noboha wisickemanu kekecac asungo Anutuarunac hama yerearu kemeu yeri yacma nanoc. Nanec yeremma yeni damu kuneng yunuec.

¹² Nga kurumennunac enacadumengtoa mong negenggec yofi edeyuruec, “Ngeri yei ereec!” ifi deu yeri ngabafocngina yeneac kicfu hoeng manau kurumennu enoc.

¹³ Enec naso imohaingoc usoctoa meu taongyada tegia 10 imohacnac noboha mocgu (1/10) barackeac. Usocyada meec, imocac manaunac ngicngac kpetengina 7 tauseng yeni homegec. Homegec ngicngac tosea yeni kengec amma Anutu kurumennu kecde, ye afehegec.

¹⁴ Ubahodung botuha imoc yomohai wisickeu ubahodung wisic wisickeango bic haude.

¹⁵ Anu angero wisic wisickeango trampeha fifu kurumennunac enacadumengtoa mong fingecma yofi degec,

“Kebunina nga yeac danggunucngic Kristo yeri yaguc bangectoa bangec sasawaac mingina andape. Amma Kebuninango ngictau kecde nga kecengkefude.”

¹⁶ Ifi degec ngic enara 24 Anutuac hoannu ngictau tatacnginau tacdae, yeni makpema kicngina hetutuckema Anutu afehegec. ¹⁷ Afehema yofi degec, “Kebu Anutu Kuctoa mingina, neni dangge edegudimbe. Ge bicngoc kec nec nga yaguc kec nec, ge geangga kuctoa mema mekecma yaguc ngictau kec nec. ¹⁸ Ngicngac bangeha bangeha kecdae, yeni herebu anggec geac herebuac naso ine yofinenggac hau geng homegec yeni yoacngina isinggema desinade. Wanacngicfocga profete nga kpetiac arengfocga kuneng nga kapiango geac kpacga eweheienda, yeni angammemenginaac turunga megecde. Nga ngicngac bangec memanganegec geng memanganeyununade.”

¹⁹ Anu kurumennu Anutuac womonggac naguya megec yeac dzadzahacac katapa kicnginango henggec. Hemmagec piratac heiu udumengtoa nga gbururungtoa heiec amma usoc meu nomang gbomeatoa maec.†

12

¹ Anu soi engena mong kurumennu yofi fingeru henggec. Ngac mong tarec, ye wambaya wenac nga hania bageau afo amma oruhau ira mong asomeng 12ngo memea. ² Ye hereagoc amma sabac fingerudeac gadze kiu arohoec.

³ Nga faka mong ifingoc kurumennu fingeru henggec. Imoc sekactoa saccac mong kuneng yombong. Ye oruha 7 nga baiha 10 nga ye oruhau

† **11:19:** Kia kpema seriu heima dzimbong kuneng ukuu maande isoc.

ira 7 heiu tarec. ⁴Taru yeac dziango kurumenggac asomeng yenearunac harebecac noboha mocgu ($\frac{1}{3}$) taiyunuma bangecfu ukuyunuec. Nga ngacngo sabac meu sekactoa ye sabac gbokoudeac negemma ngac yeac kicfu nanec. ⁵Nanu ngacngo medac mong meec. Meu yeac sabaha ine faratac wangepma Anutuaru, yeac ngictau tatacfu meemma faigec feec. Nga medac imoc, yeng bangeha bangeha ngicngac aiengyasungo garengyunuude. ⁶Nga ngac ye worama bangec kisiu dokuya kpacfu kenec. Kenu yeneng ye uameme 2 tauseng 2 handred 60ac (2260) manau nenesemeng mima henggareng ammigecde. Anutungo yeac tatac ihai bic mengereec.

⁷Anu kurumennu dzikactoa fingerec. Imoc yofi, Mikae nga angerofora yeneng sekactogoc ewegec sekac nga angerofora yeni turunga merenggec ⁸kucngina soha mi anu kurumennu tatacnginaac titing monggoc mi feec. ⁹If anu sekactoa, imoc boudzoc esea kpara mong Mangana mingina nga Satang, ye nga angerofora bangecfu ukuyunugec. Ukuyunugec yeng bangecngicngac sasawa ikocfu wangecyunuu yeni ye modacandae. ¹⁰Nga enacadumengtoa mong kurumennu negemba yofi deec,

“Memengerec nga kuc amma eucerereng imocac mingina Anutu. Nga yeac danggunucngic Kristongo yaguc imocac uakibi nga kuc metacde. Ngic tosofocnina yoacfu faiyunukefec, yeng Anutuninaac kicfu hadzing toforec yoacfu faiyunuma kefu yeneng yegoc ewema firang amma ye

bic kurumennunac ukugec maec. ¹¹ Yeni ramamedahaac sawa nga Kebuac yocac dekperagigec amma yenang kekecngina mi segerema homecac wagecac amma firang anggec. ¹² Kurumeng nga areng kurumennu kecdac, ngeni imocac amma ubangerec negembisia. Nga bangec nga kondung ngeri ebictoa meficgeecde. Mangana mingina ye nasoya wegenu negemma ngabatoagoc yombong ngenearu haecac ngeri dafi anecde, imoc obohode.”

¹³ Yeni sekactoa bangecfu ukugec, yeng imoc hentegecma ngac sabac medac meec, ye kisanec.

¹⁴ Kisanu ngac ye boudzoctoaac kicfunac worama bangec kisiu dokuya kpacfu kenudeac yeneng ngac imoc huntoctoa kpeganga migec. Ye ihai naso mocgu nga naso goa amma naso noboha taru yeni henggareng ammima yaka migecde.

¹⁵ Migec boudzocngo ye kisanudeac enaraunac dokuyuyuangoruru maec. ¹⁶ Mau bangecngo ngac agenga tima enara anggeu sekacngo enaraunac dokuyuyua urunu bangecngo imoc nedarec. ¹⁷ Nedaru sekactoaango ngacac amma herebu negemma kemma yeac arengfora tosea Anutuac singyoac modacma kecdac nga Yesu Kristoac dedekperagi mekecdac, yenearu dzikac kpeudeac kenec. ¹⁸ Anu ye sangi witiau kondung tegiau nanec.

13

¹ Hembra kondung manaunac wasaiyang yeneac mimiha mong ereec. Ye baiha 10 nga oruha 7 amma baiha imocac witiau ira 10. Nga oruc imoc

yeneac witinginau Anutuac desure kpac hania hania feec. ² Imocac sebia wasaipusitoaac sebi isoc anec nga enara imoc raiong isoc amma ye bea isoc soriherehagoc.

Anu sekactango uakibi nga kuc nga ngic-tau tatic wasaipusitoa mima ngicngac homac garengyunuudeac uakibi miec. ³ Miu wasaipusitoa oruha mong yofohagoc henai. Oruha imoc yunugec kubectoa anu homeandae, ifia isoc hembra bangeha bangeha ngicngac yeni wasaipusi imoc hemma kerectegec amma modacgec. ⁴ Modacma sekactoa numumigec nga sekactoa yeng wasaipusingo garengyunuudeac uayoac nga kuc miecac amma yeni wasaipusi numumima yofi degec, “Mongngo ye isoc amma yegoc naric mi eweude.”

⁵ Enara migec ye dearogoc sicsauc amma Anutu desure ammiec. Nga yeni kuc yofi migec, yeng afo 42ac manau ngicngac garengyunuudeac uayoac nga kuc mekefec. ⁶ Amma ye enara anggema Anutu desure ammima Anutu kpara nga amea amma kurumennu kecdac, yeni desure ayemmeec. ⁷ Ayemmeu yeng ngicngac kpetiac yenearu dzikac kpema firang anudeac migec. Migec yeng ngicngac fakaga fakangina nga sebi siric hania hania amma yoacna yoacga nga bangeha bangeha garengyunuudeac uayoac nga kuc migec. ⁸ Ifi migec ngicngac sasawa bangecfu kecdac, yeneng wasaipusi numumigecde amma ramamedaha kpebucgegec, yeac kekecac kibiu ngicngac kpacngina bangec meficmeficgeaunac mi fede, yeneng wasaipusi numumigecde. ⁹ Kedzahagoc kecdengo yoac yomoc negembeso.

10 Ngic mong megec witicamau faigecdeac degecdeu ye witicamau kembeso. Ngicngac wasai beangngo yunuhomegecdeac degecdeu imocngo yunuhomebisia.

Anu ngicngac kpetiac yeni modzotitia kpac nga negen negensingoc kecbisia.

11 Ifi hembra wasaiyang mong bangec manaunac ereec. Ye rama isoc baiha yohockang metacma sekactoa yeneac faka modacma yoac deec. 12 Ifi deu yeng wasaipusiac uakibi nga kuc sasawa mekecma yeac amma ngicngac garengyunuudeac ua sasawa meec. Mema bangectoa bangec nga bangecac witiu ngicngac kecdae, yeni wasaipusi homemeaac kubec bic mosiec, ye numumigecdeac ayemmeude.

13 Ayemmeu wasaiyang baiha yohockang, yeng yoara negensingegecdeac fakatoa meu gerec kurumennunac ngicngac yeneac kicfu bangecfu maec. 14 Mau ye wasaipusiac kicfu faka meudeac kuc migecac amma ngicngac bangecfu kecdae, yeni ikocfu wangecyunuu ye modacgecde. Modacgec ngicngac bangecfu kecdae, yeni deu wasaipusi wasai beangngo heigec monggoc gboriec, yeac onga mong megec.

15 Megec yeng wasaipusiac ongea ongaasu mi-udeac kuc meec. Meu ongango ifingoc yoac dede negenec. Nga ngicngac sasawa onga mi numumigec, yeni kpebucyunuudeac kuc metarec.

16 Metacma ye ngicngac sasawa kuneng nga kapia, finacgoc nga finaha kpac, wanacngic nga ngicngac yengenaoc kecde, yeni kibi mong sebikibi isoc marifoinginau me mesunginau mekecgecdeac de-

seriyemmeec. ¹⁷ Ifi anu ngic mongngo kibia me wasaipusiac kpara me kparaac kpete mi mekefude, yeng wiac mong naric mi bummeude me faiude. ¹⁸ Kibi yomoc negen negentegecgoc osobesonga. Wasaipusiac kpete imoc ngic monggac kpete nga ngic irec ireckeagocngo yomoc osonegeng ambeso. Wasaipusiac kpete imoc 666.

14

¹ Ni ramamedaha hembra ye Siong tikiu ngicngac 144 tauseng yenigoc nanggec. Nanggec, yeni ramamedahaac kpackibi nga Manggacac kpackibi mesunginau mekecgoc. ² Nga kurumennunac udumeng mong doku homac gbururungtoa yeneac udumeng isoc negemba imoc gita kpekpe yeneng gitangina kpegeg udumeng fingecande, ifi isoc anec. ³ Anu yeni ngictau tatacfu nga wiac kekecnginagoc ⁴ amma ngic enara yeneac kicfu namma yegeg gboria mong heigec. Heigec ngic 144 tauseng bangecfunac bic bummeyunuyunua, yeneng yegeg imoc naric negemma heigec. ⁴ Ngic imoc yeni ngac yenigoc mi kecma wonongngina kpac amma kongaha yombong kecgoc ramamedahango ihai me ihai kengande, imohai ye modackecdae. Ramamedahango bangecac ngicngac yeneacnearunac buma heima yeni bummeyunuu yeni Anutu nga yeac waracareng anggec. ⁵ Amma enacnginaunac ikoc mong mi ereu yeni kpetiac nga manganangina kpac kecgoc.

⁶ Ni angero mong henai, ye sawakebangau herecge kenec. Kemma siduc gombang feengkefude, imoc yeng ngicngac bangecfu kecdae, yeni edeyunuudeac metarec. Metacma

bangeha bangeha ngicngac nga fakaga fakangina amma yoacga yoacna nga sebi siric hania hania, yeni ⁷ enacudumeng kunengngo yofi deec, “Ngeni Anutuac damungunuu eweheimibisia. Anutungo ngeneac yoac desiude imocac naso bic hadeac ngeni kurumeng nga bangec amma kondung nga dokukiwa meficyunuec, ye numumibisia.”

⁸ Ifi deu angero mongngo ye modacma yofi deec, “Makpedacnoc, Babirong taongtoa imoc bic makpedac. Yennoc ngaba nga kaiserofakayaac waindoku seria ngicngac sasawa gumecyunuu nedacgec.”

⁹ Ifi deu angero harebecngo modacyuruma enacudumeng kunengngo yofi deec, “Mong ye wasaipusi nga ongea numumima yeac kibi mesuyau me mariauu mema mekefudeu ¹⁰ ye Anutuac ngabaac waindoku seria nebeso. Waing imoc seria yombong dokugoc mi yerec yerecgea yeac ngabaac taseu kpakegec. Kpakemigec, yeng angero kpetiac amma ramamedaha, yeneac kicfu gerec nga sarafa* manau kpendzeng kpeude. ¹¹ Kpeu ngicngac wasaipusi nga ongea numumikecma yeac kparaac kibi megec, yeneac kpendzenggac hosuc imoc naso wisic wisickea kpac erekefu yeni hadzing tofocnac ruae mong mi meficgegede. ¹² Ifi anu ngicngac kpetiac Anutuac singyoac modacma Yesu negensinggema kecdae, yeni modzotitia kpac seria kecbisia.”

¹³ Ifi negemba kurumennunac enacudumeng mong fingecma yofi edenuec, “Ge kibi yofi ohona, ‘Yaguc hanahema ngicngac Kebuaru

* **14:10:** Imoc hoc dzedzea dzagec dzagec homuna mangana.

kpeketahama homedae, yeni kenecnginagoc. O, Asungo yofi dede, angammemengina gombungango modacyunukecdeac yeni ebicfunac tacnegenggecde.’ ”

¹⁴ Anu ni hoeng mong kongac kongac henai. Hembra imocac witiau ngic mong siriha ngicac medac isoc tarec. *(Danie 7:13)*

Ye oruhau ira mong golngo memea heima mariaue soe mong enaragoc wit fora heiandae, ifia metarec. ¹⁵ Metaru angero mongngo womonnunac erema hoeng witiau tarec, yeng enacudumeng kunengngo arohoma yeac yofi deec, “Bangecac semeng fora anu kpememenaso bic hadacac amma ge forakpekpe soega sinema kpekpe ua mena.” ¹⁶ Ifi deu ngic hoeng witiau tarec, yeng witkpekpe soea bangecfu ukuma bangecac semeng fora kpeec.

¹⁷ Kpeu angero mong kurumenggac womonnunac ereec, ye ifingoc forakpekpeac soe mong enaragoc metarec. ¹⁸ Nga angero mong gerec garenggeudeac uayoac nga kuc mekefec, yeng arataunac hama enacudumeng kunengngo forakpekpeac soe enaragoc metarec, yeac yofi kparec, “Bangecac waing gbomea bic kpauedac. Imocac ge forakpekpeac soega enaragoc faina kenu waing gbarihagoc kpedzucnedacna.”

¹⁹ Kparu angerongo forakpekpeac soea bangecfu ukuma bangecac waing gbarihagoc herecgema kpedzucyunuma Anutuac ngabaac waing tidzoc tidzohoac hoctoau ukuyunuec.

²⁰ Ukuyunuu waing tidzoc tidzohoac hoctoa taong ngadeau nanu tidzamegec. Nga waing tidzoc tidzohoac hoctoanac sacngo enec, imoc

becosic yeneac enacaieng kpeserema feu bangec
300 kiromitaacsoc mewakeec.†

15

¹ Ni kurumennu soi mong engena bibiagoc henai. Hembra angero 7 yeneng kpendzeng 7 wisic wisickea metacgec. Anutuac ngabaac kpendzeng 7ngo fingecma kpac andarude. ² Ni kondung garas isoc mong gerecgoc yerec yerecgea henai. Hembra ngicngac yeni wasaipusi nga ongea nga kibia amma kpara imocac kpeteagoc, yeni areng imoc yenigoc ewema firang anggec yeneng kondung witiau Anutuac gita menanggec.

³ Menamma yeni Anutuac wanacngiha Mose nga ramamedaha, yereac yegec yofi dema heigec, “Kebu Anutu Kuctoa mingina, angammemega imoc engena nga bibiagoc nga ge bangeha bangeha yeneac ngictau. Geac sing imoc dindingac nga fora. ⁴ Kebu ge kpetiac, imocac amma sasawango geac damuyunuu kpacga afehebisia. Amma geac faka dindin-gac didiu fingerecac bangeha bangeha ngicngac yeneng hama geac kicfu numu-genggecde.”

⁵ Ifi heigec wisickeu hembra kurumennu Anutuac womonnu dzadzahac katapaac kporucedzo naguya megec. ⁶ Megec angero 7 kpendzeng 7 metacdae, yeni wamba kongaha linenggo memea nga kperagiagoc heima fadeng golngo memea mokucnginau yerec

† **14:20:** 300 kiromita imoc Finschhafen kemma Goroka herea, imocacsoc. Ye stadi 1600 ohoec. Stadi mocgu imoc mita 185 isoc ande.

yerecgea heima womonnunac magec. ⁷ Magec wiac kekecnginagoc 4 yenearunac mongngo angero 7 sokoc 7 yemmeec. Sokoc imoc golngo memea nga Anutu kecede nga kecengkefude, yeaec herebungo imohai wakema feec. ⁸ Feu Anutuac kibikperagi nga kuc, imocac hosucngo womong mewakeec. Ngic mongngo womonnu mi engengkecmanu angero 7 yeneac kpendzeng 7 sasawa wisickedarec.

16

¹ Ni womonnunac enacudumeng kuneng mong negemba yeng angero 7 yofi edeyunuec, “Ngeni kemma Anutuac herebuac sokoc 7 bangecfu kpakegec mau.” ² Ifi deu angero warac waracngo kemma sokoha bangecfu kpakeec. Kpakeu ngicngac wasaipusiac kibi metacgec nga ongea numumigec, yeni kubecngina gereagoc nga mangana fingeceyemmeec. ³ Anu angero yohockangngo sokoha kondunnu kpakeu kondungngo sac amma meremma ngic homececac sac, ifi isoc anec. Nga wiac sasawa kekehagoc kondunnu feec, imoc homeec. ⁴ Homeu angero harebecngo sokoha doku yuyuya nga mafefeaac kiwau kpakeu imoc sasawango sac anec. ⁵ Nga negemba dokuac angerongo deec, “Kebu kpetiac mingnina, ge bicngoc kecma yaguc kecneec. Geac fakaga imoc dindingac, ifi anu wiac yomoc sasawa yoacfu faiyununec. ⁶ Nga yeneng areng ifia amma ngicngac kpetiac nga profete yeneac sac kpakegec. Imocac amma geng sac negecdeac gume-cyununa negecdeac ngereede.”

⁷ Ifi deu negemba aratango deec,

“O Kebu Anutu kuctoa mingina, ge yoac fora dema ngicngac fakangina isinggema sing dindingacfu forayangina denec.”

⁸ Anu angero 4ngo sokoha wenacac witiau kpakeu imoc ngicngac gerehango yonohoudeac kuc meec.

⁹ Mema gereango homac yombong yonohou ngicngac yeni ubangina sifu mi dzigeneec. Yeni kpendzeng 7gac mingina Anutu, ye mi afehema yeac kpara desure ammigec.

¹⁰ Anu angero 5ngo sokoha wasaipusiac tatacfu kpakeu yeac eucerereng kundung kpeec. Kundung kpeu ngicngac yeni asira kuneng negemma nedzarangngina kirecgegec. ¹¹ Amma yeni asirangina nga kubecnginaac amma kurumenggac Anutu desure ammima angammemenginaunac ubangina sifu mi dzigeneec.

¹² Anu angero 6ngo sokoha Eufрата dokutoau kpakeec. Kpakeu ngictau wenac ere ereaunac singngina meficgeudeac doku imoc dzikeec.

¹³ Dzikeu hembra sekactoa nga wasaipusiac dumbengngiraunac amma profete ikoha, yeac enaraunac asu harebec wononginagoc erema magec nga yeni siricngina waborac isoc.

¹⁴ Asu imoc yeni hadehade mangana yombong amma negensingegecdeac faka kuhagoc meandae. Nga yeneng bangec sasawaac ngictau Anutu kuctoa mingina, yeac uamemetoa, naso imocac dzikacfu kpedzucyunudacgecac yenearu kenggecde.

¹⁵ “Negenggec, ni hamangecmeme ngic isoc habade. Haba mong ye gbori kecma

wambaya garengge kefu ngicngac yeneng sengganga mi henggecde nga gamea mi henggecde, ngic ifia ye kenehagoc.”

¹⁶ Nga asu wononginagoc yeni ngictau bangec mong kpara hebiraiyo yoacfu Hamagedong, ihai kpedzucyunugec.

¹⁷ Kpedzucyunugec angero 7ngo sokoha sawau kpakeu womonnunac enacadumeng kuneng ngictau tatacfunac hama deec, “Bic fingecdac.” ¹⁸ Ifi deu piratac nga udumeng amma gbururung fingeru, usoctoa meec. Nga ngicngac bangecfu keceregec, imohai usoc kunengtoa nga engenayombong ifia mong mi meec. ¹⁹ Usoc mema taongtoa mendziru harebec anec. Nga ye bangeha bangeha yeneac taong homac hembarackeec. Hembaracke Anutungo Babirong taong negensiu ngaba nga herebuac waingsokoha miec. ²⁰ Anu nuc sasawa woragec nga ngicngac yeni tiki hofocma monggoc mong mi meficgegec. ²¹ Nga kurumennunac nomang gbomea kia isoc ngicngac witinginau mau yeni kpendzeng kuneng kpegec. Gbomea mocgu mocguac ebiha imoc 30 kiroacsoc anec nga ngicngac yeni Anutu desure ammigecc. Nga nomang gbomeango kpendzeng kuneng yombong yemmeec.

17

¹ Angero 7 sokoc 7 mekecgec, yeneacunac mongngo nearu hama nigoc denegeng amma yofi deec, “Singtoangac kuneng doku homac yeneac witinginau tacde, ye angammemeaac turunga migeccde. Ge hana imoc edzacgubade. ² Bangecac

ngictau yeneng yegoc serofaka anggec nga yeac serofakaac waingdokungo ngicngac bangecfu kecdae, yeneac ubangina mesufuec.”

³ Nga angerongo Asuac kucfu menuu bangec kisiu dokuya kpacfu kenic. Kemma hembra ngac mong wasaiyang kpauc kpaucac witiu tarec. Nga wasaiyang ye oruha 7 nga baiha 10 amma sebia sasawa imoc desure kpacngo wake wakea. ⁴ Ngac ye wamba giweng giweng nga kpauc kpauc nga gol nga hoc gombunga amma kubu buma kuneng heima kperagiagoc tarec. Nga ye kpakenec mong golngo memea, imohai kaiserofakaya wonongagoc wake wakea mariaui metarec. ⁵ Amma yeac mesuyau kpac mong negensufuya oho ohoya feec. Kpac imoc Babirong taongtoa, ye bangecac singtoangac amma faka mangana yombong yeneac nonggongina ande.

⁶ Nga ngac henai, yeng ngicngac kpetiac nga Yesuac dedekperagi yoac dema kegec, yeneac sac nema ubasufu anec. Anu ni ye hemma homac kpidohoi. ⁷ Kpidohoba angerongo yofi edenuec, “Ge mi kpidohona. Ni ngac nga wasaiyang oruha 7 nga baiha 10 ngac atickekecde, yereac negensufu edegubade. ⁸ Ge wasaiyang henna ye bicngoc kefec nga yaguc mi kecde. Ye teng buya kpac imohacnac eredac nga ye mangedacma kpac anudeac kenude. Anu ngicngac bangecfu kegec kpacngina bangec hanac hanaheaunac kekecac kibiui oho ohoya mi fede, yeni wasaiyang bicngoc kefec nga yaguc mi kecma haude, imocac amma yeni hemma kpidohogecde.

⁹ Yei negen negengtegec nga negen negeng irec

ireckea mekecbesonga. Oruha 7 imoc tiki 7 anu ngac ye tataha yeneac witinginau ande. ¹⁰ Nga yeni ifingoc ngictau 7. Yeneacunac 5 bic makpegec nga mocgu taru mong ye mi hadacngoc. Ye hama naso kapianecsac tacbeso. ¹¹ Wasaiyang bicngoc kefec nga yaguc mi kecede, ye ifingoc ngictau kpetea 8 nga ye sifu 7 yeneacunac mong amma mangedacma kpac anudeac kenude.

¹² Baiha 10 hennec, imoc ngictau 10 bangecac eucererengngina mi megecngoc, yeni ine aua mocguacsoc wasaiyangngoc ngictau ua megedecdeac uayoac nga kuc yemmegec megedecde. ¹³ Yeni negen negeng mocgu mekecma uakibingina nga kucngina wasaiyang wamima yeng kuc imoc mekefude. ¹⁴ Amma yeni ramamedahagoc ewemagec yeng firang anude. Imoc yofiac, ramamedaha ye kebu yeneac Kebu nga ngictau yeneac Ngictau. Nga ngicngac kpacyunuyunuya nga segec segereyunuya amma ngicngac ramamedaha negensingema kecdac, yeni yegoc firang anggedecde.”

¹⁵ Anu angerongo yofi edenuc, “Singtoangacngo doku homac yeneac witinginau tacde, imoc yeni habu toa, sebi siric hania hania nga yoacga yoacna amma bangeha bangeha imoc yeneac ngicngac. ¹⁶ Ge wasaiyangngac baiha 10 hennec, yeni wasaiyangngoc singtoangac ngadehema wiara megec ye senggang entegeng tarude. Taru yeni yeac fusia nema ngac imoc gerecfu ukugec dzeude. ¹⁷ Anutungo ubanginau negen negeng yemmeecac yeni negen negeng mocgu amma ngictau uaac kucngina wasaiyang migece.

Mima yeneng wasaiyang yoara modacgec kecma Anutungo negenecef uareng sasawa mesigecde. ¹⁸ Anu ngac hennec yeng taongtoa nga bangecac ngictau yeneac witiu ngictau uaac kuc metacde.”

18

¹ Imocac ngadeau hembra angero mong garengyunuudeac uayoac nga kuctoa metarec, ye kurumennunac mau yeac kperagingo bangec mekperagiec. ²⁻³ Mekperagiu enacadumengtoayango kucgoc yofi arohoec,

“Babirongtoa ye makpema hadehade yeneac amabangec nga asu wonongnginagoc sasawa amma neng sasawa mangac manganea wonongnginagoc, yeneac amabangec fingerec.

Yeac kaisero fakayaac waindoku bangeha bangeha ngicngac sasawa yeni imoc negec. Bangecac ngictau yeni yegoc serofaka anggec nga bangecac emekeng emehaac ngickuneng yeni yeac kuc nga finactoa gombunga uaya kpac, ihacnac finactoainginagoc anggec.”

⁴⁻⁵ Anu negemba kurumennunac enacadumeng mongngo yofi deec,

“Ngicngacfocna, yeac kopocsigoc mi anggecde nga kpendzenga mi kpegecdeac ngeni yearunac wama kenggec.

Yeac kopocsingoc kurumennungoc heiengkefu Anutungo imoc negensima kecde. ⁶ Nga yeng ngeni ngemmeec, ngeni imocac turunga ifi meremmima angammemeyaac-soc naso yohockang amma migec. Nga

ye kpakenec yeregeec, imohai noc wiac tarec negemma ngeneng naso yohockang yeregemigec. ⁷ Ifi anu ye yengena sebia meemma finac nga kekec uaya kpac, imohai faiemeec, imocac sirihau kpendzeng nga ubahodung migec. Ye ubeau yofi dekecde, 'Ni hodzec kpac, ni ngactau kecma ubahodung naric mi negembade.' ⁸ Imocac amma uameme mocguac manau homec nga ubahodung amma here homehome hanahemima yeac witiau kpendzeng ifia fingeru ngac ye gerecfu dzeude. Imoc yofiac, Kebu Anutu ye kuhagoc, yeac faka isingema foraya desiec.

⁹ Nga bangecac ngictau ngac yegoc serofaka angkecgec amma finactoa nga kekec uaya kpac mekecgec, yeni gerehaac hosuc hemma yeac kiacsonggong anggecde. ¹⁰ Yeni yeac kpendzeng-gac kengec amma hereau yombong namma yofi degecde,

'Ge aua mocguac manau hanahema yoacfu faifaiguac forayaga bic hadacde. Imocac amma yei yei Babirong, ge taongtoa nga taong kucgagoc.'

¹¹ Nga bangecac emekeng emehangic yeni finacngina wageu faiandae, imoc mongngo monggoc mi bummeudeac yeac amma kiacsonggong anggecde. ¹² Finac goa, gol nga siriwa amma hoc seria nga gombunga nga kubu buma kuneng amma wamba gombunga siricngina giweng giweng nga kpaua amma hiring harang. Nga ic sasawa homuna gombunga amma wiac sasawa ere-

fanggac baihango memea nga wiac hania hania ic seria buma kunengngo memea amma kopango nga aiengngo memea nga hoc seria nga kibia gombunga wiac sasawa imocngo memea. ¹³ Imoc mosoki nga wiac hosuc homung kerengagoc nga kerecdoku homuna gombunga nga hosuc homuna gombunga kendo isoc seria amma waingdoku nga kerecdoku nga flawa uuha nga wit gbomea. Burumaka nga rama amma becosic nga keretac. Nga ngicngac sebi nga ubaonganginagoc momoc wanac megec, imoc sasawa wagenginaw wakema kengha anggec.

¹⁴ Amma geac ubasebigango wiac forayaac am-mikefec, imocngo waguma wiac sasawa gombunga kibikperaginginagoc, imoc gearunac bic woraec. Woraus ifia monggoc mi meficgegecde.

¹⁵ Ifi anu emekeng emehangic yeni singtoangangoc meficyunuu wiac sasawa yomoc faima finactoanginagoc anggec, yeneng yeac kpendzenggac kengec amma hereau yombong namma kiacsonggong anggecde. ¹⁶ Amma yofi degecde,

‘Yei yei taongtoa, ge wamba gombunga giweng giweng nga kpauc kpauc nga gol nga hoc seria buma kuneng, amma kubu buma kuneng, imocngo faifaia heidang.

¹⁷ Imoc aua mocguac manau finactoa sasawa gerecngo memanganau kpac andarec.’ Amma wage kisang kisang sasawa nga yeneac bagenginaw wageu ua meandae amma ngicngac sasawa kondunnu ua meandae, yeni hereau namma ¹⁸ yeac gerecac hosuc hemma yofi dema kpacgec, ‘Taongtoa ifia mong mi fede, kpac.’

19 Yeni orucnginau sendung ukuma kiacsonggong amma kpacma degec,

‘Ye aua mocguac manau gerecngo memanganeu kpac anecac amma, yei yei taongtoa. Nga yeac ngicngac sasawa wagenginagoc kondunnu kengandae, yeni yearunac finac-toanginagoc anggec.’

20 Anutungo ngeneac turunga yeac witiu faiecac amma kurumeng nga kpetiac areng kecdae nga aposoro amma profete, ngeni yeac amma so-gaibisia.”

21 Anu angero kuhagoc mong, yeng dzamandzingtoa mong mema kondunnu ukuma yofi deec,

“Yeni Babirong taongtoa gereagoc kondunnu ifi ukugec monggoc naric mi meficgegede.

22 Ukugec gitakpekpe nga yegec heihei nga kungac fifi fifi nga trampet fifi fifi, imoc geac manau naric monggoc mi negenggede. Nga marikibi hania hania imocac uamemengic, yeni geac manau monggoc naric mi kecgede. Nga hocfu flawa uuha medzameandae, imocac udumeng geac manau monggoc naric mi negenggede.

23 Geac manau kifaac kperagia monggoc naric mi kperagiude. Nga ngicngac meturangemebesoeso andape, yereac ubangerecac arohoandae, udumeng ifia geac manau monggoc naric mi negenggede. Ge mosoc fakagango bangeha bangeha imocac ngicngac sasawa uba mesufu ayemmenec. Imocac amma geac emekeng emehangic yeni bangecac ngickuneng kecgec. 24 Nga taongtoa imocac

manau profete nga ngicngac kpetiac amma ngicngac sasawa bangecfu yunuhomegec, yeneac sacngina meficgegec.”

19

¹ Imocac ngadeau kurumennu areng kuneng yombong ubaudumeng isoc negemba yofi degec, “Halleluya, memengerec nga kuc kibikperagiagoc, imocngo Anutuninaac ande. ² Imoc yofiac, ye ngicngac yoacngina isinggema fora nga dindingac desiude. Amma yeng singtoangac kuneng serofakayango bangec memanganeec, yeac faka isinggema wanacarengfora yeneac sacnginaac turunga yearunac meec.”

³ Yeni monggoc yofi degec, “Halleluya, yeac hosuc imoc naso wisic wisickea kpac engkefude.”

⁴ Ifi degec ngic enara 24 nga wiac kekecnginagoc 4, yeni makpema Anutu ngictau tatacfu tacde, ye numumima yofi degec, “Imoc fora, halleluya.”

⁵ Ifi degec enacudumeng mong ngictau tatacfunac erema yofi deec, “Anutuac wanacarengfora nga ngicngac kuneng nga kapia amma ngicngac eweheimidae, ngeni dengeregec.”

⁶ Ifi deu udumeng mong negemba, imoc areng kuneng yeneac enacudumeng isoc anec. Imoc doku homac yeneac udumeng nga gbururungtoaac udumengtoa isocngo yofi degec, “Kebu Anutunina kuctoa minginango ngictau bic amma kecde, halleluya. ⁷ Ramamedahaac

memeturangnaso hau enemango bic efaidacac amma yeac ubangerec negemma sogaima ramamedaha afehebisina.

⁸ Ifi anu wambaya gombunga kongaha nga kibikperagiagoc heiudeac migec. Wambaya gombunga imoc ngicngac kpetiac yeneac angammeme dindingac.”

⁹ Ifi deu angerongo yofi edenuec, “Ge kibi u yofi ohona, Ramamedahaac memeturanggac fatau kpacyunuyunuya, yeni kenecnginagoc.” ifi dema yofi deec, “Anutuac yoac yomoc imoc fora.”

¹⁰ Ifi deu ye numumibadeac haniau makpeai. Makpeba yeng yofi edenuec, “Ifi mi anna! Ni ge nga tosofocga Yesuac dedekperagi metacdae, ngeneac wanac ogongina. Yesuac dedekperagi imoc profeteyoacac asu. Imocac amma ge Anutu numumina.”

¹¹ Imocac witiau kurumeng anggeu henai. Hembra ngic mong becosic mong kongac kongac, imocac witiau tarec. Nga tarec, yeac kpac yofi, Yoacdedia modackecde nga Yoac fora modackecde. Amma ye ngicngac yoacfu faiyunuude nga dzikau kecma faka dindingac modarude. ¹² Ye kiwa imoc gerec borang isoc nga oruhau ira homac heiec. Amma kpara mong oho ohoya, imoc mongngo mi negende, yengenaocsac negende. ¹³ Nga ye wamba mong sacfu nemuc nemuruckea heiec. Ngic yeac kpara imoc Anutuac yoac. ¹⁴ Nga kurumenggac wasaiareng ye modagec, yeneac becosicngina kongac kongac nga wambangina siriha gombunga imoc kongac nga dzuac dzuara. ¹⁵ Nga enaraunac wasai beang mong enaragoc ereec, ye imocngo

bangeha bangeha imocac ngicngac yunuude nga ye aiengyasungo garengyunuude. (*Mitiyegec 2:9*) Amma ye Anutu kuctoa mingina yeac ngaba nga herebuac waing tidzoc tidzohoac hoctoau tidzohoude. ¹⁶ Kporuhau nga kopohau kpac mong yofi oho ohoya feec, “Ngictau yeneac Ngictau nga kebu yeneac Kebu.”

¹⁷ Hembra angero mongngo wenac manau namma enacudumeng kunengngo arohoma neng sasawa sawakebangau kpututuckeandae, yeni yofi edeyunuec, “Ngeni kpedzucnema Anutuac yakatoau hama ¹⁸ ngictau nga wasaienara amma ngic kucnginagoc negec. Ngeni becosic nga ngicngac yeneac witiau tacdae, yeneac sebifusingina negec. Ngeni ngicngac witicngina kpac nga wanac meyunuyunuya amma ngicngac kuneng nga kapia, yeneac sebifusingina ifingoc negec.”

¹⁹ Anu ni wasaipusi nga bangecac ngictau wasaiarenginagoc yenenai. Yenemba yeni ngic becosic witiau tarec, ye nga wasaiarengfora yenigoc dzikac kpegecdeac kpedzucnegec. ²⁰ Nga profete ikohango wasaipusiac kicfu faka kuhagoc mekefu ngicngac wasaipusiac kibi megec nga yeac ongea numumigec, yeni ubamesufu ayemmeec. Anu yeneng wasaipusi nga profete ikoha yeri meyuruma kondung gerec nga sarfango* dzema kecde, imocac manau gbori ukuyurugec. ²¹ Nga becosic witiau tarec, yeac enaraunac wasai beang ereec, imocngo tosea yunu homegec. Homegec neng sasawango sebifusingina negec gebecyunuec.

* **19:20:** Imoc hoc dzedzea dzagec dzagec homuna mangana

20

¹ Imocac witiau angero mong henai. Hemba ye kurumennunac maec nga yeng teng buya kpac, imocac ki nga sengtoa mong mariaui metarec.

² Metacma sekactoa, boudzoc esea kpara mong Mangana mingina nga Satang, ye mema kifa 1 tausenggacsoc tarudeac witickeec. ³ Witickema ngicngac ikocfu monggoc mi wangecyunuudeac teng buya kpac, imohai ukuma nagu heimima kpaec faieci. Faiu kecma kifa 1 tauseng wisickeu monggoc naso kapianec ye yungecgecde.

⁴ Anu ni ngictau tatac homac henai. Ngictau tatac imocac witiau tacgec, yeni ngicngac yoacfu faiyunugecdeac uayoac yemmeyemnea. Amma wasaipusi nga ongea mi numumima kibia mesunginau me maringinau mi megec yeneng Yesuac dedekperagi amma Anutuac yoac dekperagigec. Imocac amma ngic yeneng ubangina herecgegec, yeneac ubaongangina henai. Hemba yeni sasawango kifa 1 tausenggacsoc Kristogoc kecma ngicngac garengyunugecdeac ua megec. ⁵ Yomocngo homecfunac yacyacac warac warac ande. Nga tosea homegec, yeni mi gborima kec-magec kifa 1 tauseng wisickeec.

⁶ Nga Kebungo ngicngac warac warac yacyac imohai metorokpe ayemmeude, yeni kpetiac nga kenecnginagoc. Nga homec kpetea yohockangngo yeni garengyunuudeac kuc mong mi metaru yeni Anutu nga Kristoac womong gareng kecma kifa 1 tauseng yegoc ngicngac garengyunugecde.

⁷ Anu kifa 1 tauseng wisickeu Satang witicamaunac yungecgecde. ⁸ Yungecgec, yeng kemba bangeha bangeha imocac ngicngac ikocfu

wangecyunuma ngicngac bangectoa bangec, imocac tegia 4 kecdae, yeneac kpacarengngina Gogo nga Magogo, yeni dzikac kpegecdeac kpeturangyunuude. Imoc yeneac kpetengina kondung tegiaac sangi isoc. ⁹ Yeni bangeha bangeha, ferecgema kpetiac areng tacgec amma songotaongtoa, imohai kemma yerecgema nanggec. Nanggec kurumennunac gerecngo mama yonohodarec. ¹⁰ Yonohodaru mangana minginango ikocfu wangecyunuec, ye gerec nga sarafa* kondunnu ukugec. Nga wasaipusi nga profete ikoha, yeri imohai bic kecma hadzing tofocnac kpendzeng kpegecde nga kpekengkecbesandae, imoc wisic wisickea kpac.

¹¹ Imocac witiau ngictau tatactoa kongac kongac mong henai. Nga imocac witiau tarec, yeac kiwaunac bangec nga sawakebanga woraec tatacngira mong mi feec. ¹² Nga ngicngac kuneng kapia bic homegec yenenai. Yenemba yeni Anutuac kicfu nammagec kibi homac mesima kibi mong kpara Kekecac kibi mesigec, kibi imohai homegec yeneac angammemengina oho ohoya fede. Nga yeni imoc hemma yoacngina desigec. ¹³ Nga kondung manau homegec kecdae, kondungo yeni wayunuoc. Homecac eucerereng manau homegec kecdae, ye nga homecngo yeni wayunuoc. Ifi anu ngicngac tembuc tembuc angammemengi-naacsoc yoacngina desigec. ¹⁴ Faiyunuma homec nga homecac eucerereng gereckondunnu ukugec. Imocngo homec kpetea yohockang ande. ¹⁵ Nga mongngo kpara kekecac kibi u oho ohoya mi feec,

* **20:10:** Imoc hoc dzedzea dzagec dzagec homuna mangana

ye kondunggac gerecfu ukugec.

21

¹ Ni kurumeng nga bangec gboria yerenai. Imoc yofiac, bangec nga kurumeng warac feoc, yeri kpac anoc nga kondung imoc monggoc mi feec.

² Ni Yohanengo taongtoa kpetiac, Yerusareng gboria hembra Anutuarunac kurumennunac maec. Mama efaima ngac ngicfu kende, ifi isoc ewebingehaac amma siriha gombunga yombong anudeac memengere ammigec tarec. ³ Taru ni enacadumengtoa ngictau tatacfunac negemba yofi deec,

“Henggec Anutuac kporucbedzongo ngicngac yenigoc kefu yeni yeac areng anggec Anutu yengenaoc yenigoc kecma Anutungina kefude. ⁴ Amma yeng kickumangina sasawa kicnginaunac mekerenggeude. Nga homec nga ubahodunggac kiacsonggong amma asira monggoc mi feude. Wiac warac feec, imoc bic kpac anec.”

⁵ Nga Kebu ngictau tatacfu tarec, yeng yofi deec, “Henggec, ni wiac sasawa gboria mebade.” dema edenuc, “Ge yoc imoc ohona nocac yoc yomoc fora nga ngicngac yeneng imoc negensinggegedeacsoc ande.” ⁶ Dema monggoc edenuc, “Imoc bic fingeccac. Ni A nga Y, hanac hanahea nga wisic wisickea. Ngicngac mongngo dokuac ammide, ye dokukiwaunac kekecac doku eng neudeac mibade. ⁷ Firang anude, yeng wiac sasawa yomoc maridzoming meu neng yeac Anutu amba yeng medacna anude. ⁸ Anu ngic

karoha nga negen negensinggina kpac amma

fakangina mangana wonongagoc nga ngickpekpe amma serongic nga mosocfaka angandae amma nemu numumiandae nga ikocngic sasawa, yeni ine kondung gerec nga sarafa dzema kecde, imohai torokpegecde. Yomocngo homec kpetea yohockang anude.”

⁹ Anu angero seweng yeni sokoc seweng kpendzeng seweng wisic wisickea wake wakea metagec, yenearunac mongngo nearu hama deec, “Ge hana, ni ramamedahaac enembingeha edzacgubade, ye yeac enema.” ¹⁰ Ifi deu Asungo nearu ua meu tiki kuneng nga herea, imocac bumau menu emma kpetiac taongtoa Yerusareng, kurumennunac Anutuarunac maecmoc, imoc edzacnuec. ¹¹ Ye Anutuac kuc nga kibikperagigoc amma hoc seria buma kuneng nga yaspis hoc seria, ifia isoc kperagiagoc gontaning amma pirac pirac heiec. ¹² Nga odaya hocngo memea, imoc kuneng nga herea amma naguya 12 nga naguyau angero 12 nanggec. Amma naguyau ifingoc Israeac kisic 12 yeneac kpacngo nanec. ¹³ Anu wenac ere ereaubigeng nagu harebec, nortbigeng nagu harebec nga sautbigeng nagu harebec amma wenac keme kemeaugeng nagu harebec nanggec. ¹⁴ Taongtoaac oda imoc hocngo memea nga imocac titiseria 12. Amma titiseria 12 imohai ramamedahaac aposoro 12 yeneac kpacngina oho ohoya nanec.

¹⁵ Anu angero nigoc denegeng anec, yeng taongtoa nga naguya amma oda hocngo memea, imocac kpete meudeac kpetememeyasu mong golngo memea menanec. ¹⁶ Menanu hembra taongtoa ye titiha 4 amma tegia sasawa yeneac kpetengina

socfungoc anec. Nga angerongo kpetememeyasungo kpetea meu kpete imoc 2 tauseng 2 handret 20 kiromita anec nga tegia amma witiau kpetengina socfungoc anec.* ¹⁷ Ye odaya kunenggac kpetea meu imoc 72 mita anec.† Kpete imoc ngicngac yeneac kpete amma angero yeneac kpete ifingoc ande. ¹⁸ Oda imoc yaspa hocngo memea nga taongtoa imoc gol tegengngo memea amma garas imoc isoc gontaning anec. ¹⁹ Nga taongtoaac oda titiseria hocfu siricngina fingerudeac hoc seria sasawa buma kuneng, ifi faigec. Titiseri warac warac imohai yaspa faigec, ngade, imohai sapaia, harebecfu karsedong nga 4u emerare, ²⁰ 5 imohai sadoniks, 6fu koniriang, 7nu krisorite, 8 imohai berire, 9nu topase, 10 imohai krisoprasede, 11nu hiasing amma 12 imohai ametise, ifi faifaia nanec. ²¹ Ihai naguya 12 yeni kubu gbomea kuneng 12. Nga nagu tembuc tembuc imoc gbomea mocgu mocgungo memea. Amma taongtoaac sing imoc golteggengngo memea, garas isoc ngadeau naric hentegecnade.

²² Nga imocac manau womong mong mi henai. Imoc yofiac, Kebu Anutu kuctoa mingina nga ramamedahango womonga andape. ²³ Nga Anutuac kuc nga kibikperagiango taongtoa mekperagiec nga ramamedahango kperagia anec. Imocac amma taongtoa ye wenac me afokperagi uangira kpac, imohai monggoc mi mekperagiecde. ²⁴⁻²⁵ Nga tofocnac imohai mi feudeac naguya we-

* **21:16:** 2 tauseng 2 handret 20 kiromita imoc Vanimo kemma Honiara imocacsoc. Ye stadi 12 tauseng ohoec. Stadi mocgu imoc mita 185 isoc ande. † **21:17:** Ye stadi 144 dec.

nacfu naric mi heigecde. Anu bangeha bangehaac ngicngac yeni imocac kperagiau kengha anggec bangecac ngictau kibikperagingina mema imohai faigecde. ²⁶ Faigec bangeha bangeha, imocac ngicngac yeneng afec afehe nga kibikperagingina imocac manau mekenggecde. ²⁷ Amma wiac mong wonongagoc nga ngicngac angam-memengina mangac manganea amma ikocnginagoc, yeneng taongtoa imocac manau naric mi enggecde, kpac. Ngicngac kpacngina ramamedahaac kekecac kibiufede, yenengsac enggecde.

22

¹ Imocac witiau angerongo doku mong mafefea kekecac dokugoc edzacnuec. Doku imocngo gontaning pirac pirac amma Anutu nga ramamedaha yereac ngictau tatacfunac erema ² taongtoaac singtoa botuhau mekengfeec. Feu tegia noboc noboc imohai kekecac ic nanggec, yeni kifasoc foranasoya 12. Yeni afosoc foragoc angkecgec amma ic imocac maria ngiha ngiha yeneac hafeiac memengerec ande. ³ Nga sowec sawa kpac andarude. Anutu nga ramamedahaac ngictau tatacngira imohai taru wanacarengfora ye kingang kpemigecde. ⁴ Yeni yeac kicmesuya henggecde nga yeac kpara mesunginau oho ohoya feude. ⁵ Imohai tofocnac monggoc mi anude nga kifa me wenacac kperagi imoc yeni uangina kpac, nocac Kebu Anutungo mekperagiyunuude. Nga ngicngac yeni ngictau ua megec nga mekecgec imocac nasoya wisic wisickea kpac.

⁶ Anu yofi edenuc, “Yoac yomocngo fora nga ngicngac yeni imoc negensinggegecdeacsoc

ande. Amma profete yeneac asunginaac Anutu, yeng wanacarengfora wiac bic fingecheso, imoc henggecdeac amma angeroya sueec.” ⁷ “Henggec, ni bic habade. Mong ye profete yeneac yoac kibi yomohai oho ohoya fede, imoc gombunga onggonggema mekefude, ye kenehagoc.” ⁸ Ni Yohanengo wiac yomoc hennegeng anai.

Nga hembra wisickeu angerongo wiac edzacnuec, yeac haniau numumibadeac makpeba ⁹ yeng yofi edenuc, “Ifi mi anna. Ni ge nga tosofocga profete, yeni amma ngicngac kibi yomocac yoac gombunga onggonggema mekecandae, nge-neac wanac ogongina. Ge Anutu numumibesena.

¹⁰ Naso wegenedeac amma ge kibi yomocac profeteyoac kasoyagoc wana mi febeso. ¹¹ Mong ye faka dindingac mi angande, ye faka imocngoc mekecheso. Nga wonongagoc kecede, ye ifingoc kecheso. Nga faka dindingac angkecede, ye dindingacngoc kecheso. Amma kpetiac kecede, ye kpetiac kekecfu yadiseriudeac ua mekecheso.”

¹²⁻¹³ “Henggec, ni A nga Y, warac warac nga ngade amma hanac hanahea nga wisic wisickea. Ni bic hama ngicngac tembuc tembuc angammemenginaacsoc turunga yemmebadeac mehabade. ¹⁴ Mehaba ngicngac kekecac icac deyecdeyemmea nga naguusing taongtoau naric eregecede amma wambangina dzuac dzuara, yeni kenecnginagoc. ¹⁵ Anu ngicngac kasi isoc kecdae nga mosocfaka mekecdae nga seroareng amma ngickpekpefaka mekecdae nga nemu numumiandae amma sasawango ikocfakaac songo negemma ikoc angandae, yeneng ine

ngadeau kecgecde. ¹⁶ Ni Yesungo angerona sueba yeng dedekperagi yomoc kpebung sasawa ngenearu dekperagingemmeudeac haec. Ni Dawidiac sera nga bangeha amma asoacac asomeng kibikperagiagoc.”

¹⁷ Asu nga enembingeha yeri yeac, “Ge hana.” ifi deec mongngo imoc negende, yeng, “Ge hana.” ifi debeso. Mong ye dokuac homeande nga dokuac ammiande, yeng hama kekecac doku buma kpac eng mema nebeso.

¹⁸ Anu ngicngac kibi yomocac profeteyoac negendae, ngeni sasawa gorongina kpema yofi deduae, “Mongngo yoac yomohai nande, imohai yoac mong torokpeudeu Anutungo ye kpendzeng kibi yomohai oho ohoya fede, imoc torokpemiude.

¹⁹ Amma mongngo yoac yomoc nande, imohacnac profeteyoac mong meickeudeu Anutungo kekecac icfunac yeac noboha nga taongtoa kpetiacac man-aunac noboha amma wiac sasawa kibi yomohai oho ohoya fede, imohacnac meickeude.” ²⁰ Anu wiac yomocac dekperagingemmeude, yeng yofi dede, “Foracngoc, ni bic habade.” Imoc fora. O Kebu Yesu, ge hana. ²¹ Kebunina Yesu Kristoac wosoefacngo Anutuac ngicngac kpetiac sasawa ngenearu febeso, imoc fora.

**Yoac kekehagocac Dzadzahac gboria nga
Mitiyegec
The New Testament and Psalms in the Dedua
Language of Papua New Guinea
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 21 Feb 2024 from source files dated 31 Aug 2023

19b7c48c-f4ce-5007-838d-58f01dc01ecc